

Parlamentario Shailiny Tromp-Lee:

E proceso di refinanciamiento di debe Covid hayando tiki mas atencion di Parlamentarionan hulandes

ORANJESTAD (AAN): Segun Parlamentario Shailiny Tromp-Lee, ta un hecho cu ainda Aruba ta den negosacion cu Hulanda. No obstante e hecho cu Aruba tin masha tiki espacio pa negosha, Gobierno di Aruba ta keda sinta na mesa pa saca un miho deal pa nos pais.

Mas y mas nos ta cuminsa scucha zonidonan di sosten for di Parlamentarionan hulandes y por a tuma nota cu cierto presion ta keda poni riba nan gobierno pa loke ta trata refinanciamiento di e debe di Covid-19. Nos tur por corda e video di Profesor Nicolaï, miembro di Eerste kamer, cu a circula rond algun siman atras. Argumentonan uza den e video aki ta subraya loke como Parlamentario, mi persona a bin ta indicando desde un principio y sigur a uza tur oportunidad pa accentua esakinan na reunionnan di IPKO.

Den su video Profesor Nicolaï a enfatisa cu e trato cu Hulanda a duna Aruba pa e prestamo di COVIS ta uno discriminatorio y humiyante. Peter Nicolaï ta un hurista y pa hopi aña a traha como hoogleraar bestuursrecht. E sa kico e ta papia y no tin miedo pa vocifera y sostene Aruba den su lucha pa un trato husto y mihor condicionnan di refinanciamiento.

Siman pasa durante un reunion den Eerste Kamer caminda a trata e tema di refinanciamiento di e debe di Covid pa Aruba (como parti di presupuesto supletorio di Koninkrijksrelaties), nos por a scucha Parlamentario Crone (Groenlinks/PvdA) para pa un trato mas husto pa Aruba. Su persona a indica claramente cu Hulanda ta

bay gana placa cu e refinanciamiento aki: “.....Nederland gaat verdienen op leningen aan Aruba!”. Alavez el a indica cu e no ta haya corecto pa confronta Aruba cu un knevelrente: “....we moeten Aruba toch niet confronteren met een knevelrente”.

Ta bon pa pueblo sa kico e palabra knevelrente kiermen. Knevel ta nifica: een prop, doek of stuk plakband waarmee iemand het spreken belet wordt. Cu otro palabra ‘take it or leave it! This is it!’ Cu un palabra el a splica con enberdad, como un Arubiano, nos mester mira e interes di 6,9%, el a subraya e proceso. Mirando cu nos no kier acepta nan condicionnan

(algun sin base), Hulanda ta bisa tuma e interes ridiculamente halto aki y cera bo boca.

Durante e mesun reunion nos por a scucha Parlamentario Hartog (Volt) indica cu e ta haya desapuntante cu den Reino tin paisnan cu mester bay paga interes conforme mercado y adicionalmente un risicoopslag. E ta asta indica cu mester tin otro maneranan pa atende cu e parti di supervision y administracion financiero. E tabata hopi critico puntrando asta kico Hulanda ta bay haci cu e ganashi cu nan ta bay haci cu e refinanciamiento aki di Aruba. el a enfatisa cu e ta haya cu Hulanda a dal un stap den e direccion



incorecto ora el a pone e condicionnan pa cu e refinanciamiento di e debe di Covid-19.

E desaroyonan aki sigur ta indica cu nunca ta laat! Poco poco nos ta ripara cu nos mensahe, grito pa trato husto y igual, nos urgimento pa yudansa a base berdadero di art. 36 di Statuto, nos critica cu Hulanda kier haci negoshi cu e debe di

pandemia riba lomba di nos pueblo ta hayando oido y ta pone algun politico cu enberdad tin Aruba na pecho vocifera nan opinion.

Lo ta bon pa nos hendenan biba aya na Hulanda habri orea scucha y tene na cuenta cua ta e politico y partidonan cu enberdad tin nos islanan na pecho. Un djis ta eleccion.

Copia di buki “Na mi kas” entrega na Biblioteca




ORANJESTAD (AAN): Biblioteca di Aruba a caba di ricibi e buki ‘Na mi kas’ for di Levendig Uitgever, cu ta encarga cu e produccion di 2 buki pa mucha. Esakinan ta publicacion pa Festival di Buki pa Mucha y na Curaçao e ‘Siman di Ban Lesa’.

E buki pa mucha cu biblioteca na Curaçao ta presenta e aña aki yama ‘Na mi kas’ (Bij mij thuis). Mescos cu na Aruba, esaki

ta un buki pa mucha na 2 idioma den categoria di edad di 4 pa 12 aña. Organizacion di e siman ta den man di Biblioteca Nashonal Kòrsou.

Diferente escritor y contador di cuenta di Curaçao a traha riba e publicacion aki: Mercee Doran, Merly Augusta., Alvin Inecia (Tio Ali), Edelmira Koko, Loekie Morales, Jeroen Hoogerwerf (Levendig Uitgever), Ilse Schoobaar-



Anthony y Crisen Schorea. Ilustracion ta di Ghislaine Monte y Karino Ariza.

Esaki ta un compilacion di storia tocante e topico ‘cerca nos na cas’. Un tema cu ta cerca di cada mucha y ta duna hopi inspiracion. Asina tin hopi expresion

di diferente experiencia di cultura di cas y famia.

Jeroen Hoogerwerf, doño di Levendig Uitgever y autor di buki pa mucha ta na Aruba e siman aki pa bishita diferente scol pa lesa buki y conta storia y conta algo di su trabao.